

1239-1239- OFP - Acta Capitulum Generalium Parisius Celebrati

Hec sunt acta capituli generalis Parisius
celebrati anno Domini · M° · CC° ·
XXXIX° ·

Approbamus hanc constitutionem. De tercio in tertium annum mittantur visitatores per provincias a capitulo generali. qui habeant potestatem corrigendi excessus priorum conventualium et aliorum fratrum. et. hec habet · ii · capitula.

Inchoamus has constitutiones. Statuimus ut · iiiior · provincie. Polonia Dacia. Syria; Grecia aliis provinciis per omnia aequentur tam in duobus electoribus magistri quam in potestate quam habent priores provinciales magistro ordinis mortuo vel amoto.

Item. Statuimus quod lectores quamdiu possunt officium exercere. in priores conventuales nullatenus eligantur. sed nec in diffinitores nisi forte capitulum fuerit in eadem provincia celebrandum. nec passim in confessionibus occupentur.

Item. Statuimus ut ornamenta aurea et argentea preter calices fratres nostri non habeant. nec pannos sericos. nec lapides preciosos. nec campanas ad horas nisi unam.

Item. Statuimus ne de cetero in nostris conventibus habeantur ymagines nisi picte nec fenestre vitree nisi albe cum cruce nec littere auree in libris nostris.

Item. Statuimus ut hec correctio et ordinatio et addicio ab omnibus uniformiter et universaliter observetur.

Admoniciones.

Admonemus ut fratres nostri non eligant vel postulent sibi priores. nisi ille qui preest primitus sit amotus. nec etiam sub condicione si eum contigerit amoveri.

Item. Admonemus. ut fratres nostri si vacaverit. semel in septimana celebrent in honorem beati Dominici missam conventualem. et quod in festis · ix · lectionum dicatur ad vespervas ad memoriam antiphona. Transit pauper. ad laudes antiphona. Carnis vigor. ad secundas vespervas. O decus Hyspanie. In diebus vero ferialibus ad vespervas. Senescenti Iacob. in matutinis. Imitator.

Item. Ut festum beati Vincencii fiat de cetero semiduplex.

Item. Ut fratres nostri diligenter admoneant populum. ut ecclesias et prelatos eorum honorent. et eis fideliter reddant iura sua. et quod temporibus suis ecclesias suas parrochiales frequentent.

Item. Admonemus. ne fratres nostri vadant ad domos secularium. vel clericorum pro funeribus. nec recipiant cum scandalo evidenti.

Item. Ut priores non mittant ad predicandum vel confessiones audiendas nisi fratres maturos et discretos.

Item. Fratres nostri dum officium exercent; questus publice non faciant nec procurent quod pro eis in eorum presencia in ecclesia aut in aliquo loco publico fiat. sed nec vinum nec bladum nisi ad presentis anni necessitatem accumulent.

Item. Ne fratres curias regum vel principum absque magna necessitate seu fructu animarum frequentent. nec arbitrium in se suscipiant. nec testamentis intersint. nec eorum executores fiant.

Item. Admonemus ne fratres nostri itinerantes pro quacumque necessitate habitum nisi de sui prioris provincialis licencia speciali transformant. nec prelati suis nimis sint importuni pro impetranda licencia exeundi. nisi necessitas vel evidens utilitas hoc exposcat. sed nec priores se exhibeant faciles ad huiusmodi licencias concedendas.

Item. Fratres nostri proprios currus vel equos non habeant. nec etiam alienos in domibus suis detineant nisi de licencia magistri ordinis vel capituli generalis. nec servientes seculares plus quam duos vel tres in domibus suis teneant. nisi propter necessitatem in aliquibus locis per priorem provincialem de pluribus dispensentur. pro quibus etiam in domibus nostris carnes non preparentur.

Item. Admonemus ut fratres hospites. secundum quod magis et minus in itinere laboraverint diucius et commodius procurentur. qui autem adeo infirmi et debiles fuerint. ut necesse habeant carnibus recreari sive sint priores sive sint alii extra non exeant. et si aliquando occasione capituli vel necessitate exire contigerit. nec equitent nec quadrigent. nec carnes comedant. nisi adeo gravis infirmitas supervenerit. quod aliter fieri sit necesse. Et tunc ad suos conventus revertantur.

Declaracio illius constitutionis. maior in mensa loqui poterit. qui maior est in ordine. potest loqui in mensa ubique extra refectorium absque alia licencia speciali. Et si maior supervenerit ipse quidem taceat et qui ceperat loqui. loquatur. ad mensam vero episcoporum uno loquente nichilominus alii ad interrogata respondeant.

Item. Lecti nostri in dormitorio vel alibi nullis intermediis obumbrentur. poterit tamen in extremitatibus lectorum in altitudine unius cubiti usualis a superficie lecti aliquid intermedium ligneum vel plastreum interponi. Hoc autem intelligimus. ubi celle cum lectis minime coniunguntur. ubi aliter factum est. emendetur.

Item. Admonemus. ut nulli seculari hospiti in domo nostra recepto. lectus cum lintheaminibus a nostris fratribus preparetur. quod si secum ea detulerit. poterit sustineri.

Item. Volumus ut prior provincialis cum diffinitoribus provincialis capituli visitoribus provincie conventus dividat visitandos prout viderit expedire.

Item. Volumus ut frater qui dum esset in seculo provinciam in qua natus est dimisit omnino et ad aliam se transtulerat domicilium commutando; sit de illa provincia in qua domicilium habuit. nisi de eo per magistrum vel capitulum generale aliter ordinetur.

In nomine patris et filii et spiritus sancti. Amen.